




ЖҰРТТЫ АДАСТЫРУ АДАМДЫҚҚА ҚАЙШЫ

3-бет



СЫН САФАТЫНДА

8-бет

ҰТЫСТАН ҚҰР ҚАЛМАҢЫЗ!

Біздің басылымдарға жазылып, ұтысты болыңыз!

Басты сыйлық – **АЙФОН 14 ПРО МАКС!**

Бұдан бөлек: Айфонның құлаққабы, сағаты, 2 REDMI NOTE 11 Pro ойнатылады. Сондай-ақ, қысқатолқынды пеш, шаңсорғыш, үтік секілді көптеген тұрмыстық техникалар бар. Бірқатар жұлдегер «Заң» медиа-корпорациясының қолдауымен жарыққа шыққан «ШЫТЫРМАН» шығармалар жинағына ие болады.

ҰТЫСҚА ҚАТЫСУ ҮШІН НЕ КЕРЕК?

Ол үшін пошта бөлімшесіне барып: «Заң газетіне» (индекс – 65921); «Юридическая газетаға» (индекс – 65928); «Заң» журналына (индекс – 75849); «Фемида» журналына (индекс – 75858) жыл соңына дейін жазылып, түбіртеккің көшірмесін бізге жолдасаңыздар болғаны!

Екі басылымға жазылғандардың мүмкіндігі екі есе өседі!

ҰТЫС ИЕГЕРЛЕРІ 17 ШІЛДЕДЕ АНЫҚТАЛАДЫ.

Ал, іске сәт!



ЗАҢ газеті

№42 (3573) 9 маусым 2023

zangazet@mail.ru

Қоғамдық-саяси, құқықтық газет

ZANMEDIA.KZ

БҮГІНГІНІҢ БАС ТАҚЫРЫБЫ

АУЫЛДЫ ДАМУ – АЛДАҒЫ КҮН ЕНШІСІНДЕ

Қала мен ауылдың арасындағы айырмашылық азаюы керек. Бұл барлық базалық қызметтер мен әлеуметтік игіліктер бойынша қала мен ауыл арасындағы диспропорцияларды барынша қысқарту деген сөз. Осыған орай 2019 жылы Ұлттық экономика министрлігі әртүрлі елді мекендер үшін өңірлік стандарттар жүйесін әзірлеген болатын. Халықтың өмір сүру сапасы мен әл-ауқатын арттыруға бағытталған бұл іс – халыққа сапалы қызмет көрсету және тиісті объектілермен қамтамасыз ету деңгейін арттыруға байланысты мәселелерді шешуді көздейді.

(Соңы 3-бетте)



СӘТІ ТҮСКЕН СҰХБАТ

Жандос НҰРБЕКОВ, «NOMAD» этно орталығының жетекшісі:

«ҰЛТТЫҚ САЛТ-ДӘСТҮРДІ ҰТЫМДЫ ҚОЛДАНАТЫН КЕЗ КЕЛДІ»

Жылдың өзге маусымына қарағанда жазда ел аралап, жер көруге тырысатындар барлық жерде күрт көбейеді. Әркім өз шама-шарқына қарай демалысты қызықты өткізуге тырысады. Кейбіреулер жарнамасына қызығып, шетелде демалғанды жөн санап, енді бірі саяхатты өз елімізден бастағанды қалайды. Отандық туризмге қолдау көрсету мақсатында біз Алматы облысы Қарасай ауданындағы «NOMAD» этно орталығының жетекшісін сұхбатқа тартқан едік.

– Жандос, бұл орталықтың өзгелерден қандай ерекшелігі бар?

– Біз бұл орталықты ұлттық салт-дәстүр мен әдет-ғұрыпты барынша насихаттап, оны ары қарай дамыту мақсатында ашқан едік. Әлі күнге дейін одан айныған жоқпыз. Кейбіреулер секілді ұлттық мәдениетке тек табыс көзі ретінде қарап, «Ауырдың үсті, жеңілдік астымен» жүруден саналы түрде бас тарттық. Қиындықтан қорықпай сақ дәуірінен қазақ хандығына дейінгі ата-бабамыздың бүкіл қару-жарағы мен сауыт-сайманын зерттеуші ғалымдармен бірлесіп, түгел қалпына келтірдік.

(Соңы 5-бетте)

КӨКЕЙКЕСТІ

ТІЛГЕ ӨГЕЙЛІКТІ ӨЗГЕ ЕМЕС, ӨЗІМІЗ ЖАСАП ОТЫРМЫЗ

Мемлекеттік тіл – мемлекеттің бүкіл аумағында, қоғамдық қатынастардың барлық саласында қолданылатын мемлекеттік басқару, заң шығару, сот ісін жүргізу және іс қағаздарын жүргізу тілі.

Қазақстанда қылмыстық, азаматтық, әкімшілік сот ісі мемлекеттік тілде жүргізіледі деп анық жазылған. Ал қажет болған жағдайда сот ісінде мемлекеттік тілмен қатар орыс және басқа тілдер қолданылады деп бекітілген. Бұл жерде біздің басты назар аударатын дүниеміз – «жүргізіледі» деген сөз бен «қолданылады» деген сөзді ауыстыруға болмайды. Атап айтқанда бұл тұрғыда «жүргізіледі» сөзі сот процесіне байланысты, ал «қолдану» оны тек сот процесінде пайдалану дегенді білдіреді. Оның үстіне қажет болған жағдайда ғана. Яғни, бұл тұрғыда айтарымыз заңның

басты қасиеті оның нормативтік актілерден жоғары екендігінде және қалай оқылса, солай қолданылуға міндетті.

Егер, осы заңның мәтініне зер салып қарасақ, мемлекетімізде сот ісі мемлекеттік тілде, яғни, қазақ тілінде жүргізілуі тиіс. Мемлекеттік тілмен бірге орыс және басқа тілдер қолданылуы мүмкін. Алайда қажет болған жағдайда ғана.

Енді Азаматтық іс жүргізу кодексінің 14-бабына тоқталсақ. Оның бірінші бөлігінде сот ісі мемлекеттік тілде жүргізілетіндігі тайға таңба басқандай белгіленген. «Ал екінші бөлігінде

сот ісі мемлекеттік тілде жүргізілетіні мүлдем жоққа шығарылып, «сот ісін жүргізу тілі сотқа талап-арыз берген тілге қарай сот ұйғарымымен беріледі» делінген. Енді осыдан туатын қорытындыға сүйенсек, сонда еліміздің соттарында қазіргі заңнаманың талабына қарай кез келген елден келген азамат істі өз тілінде қаратуға құқылы.

Ал екінші объективті фактор төңірегінде бұл мәселені қаузайтын болсақ, ол қызметкерлердің қазақ тілін меңгеруіне байланысты болып отыр. Осы процесі жүргізетін органның кейбір қызметкерлері мемлекеттік тілді жете меңгермеуімен бірге, қазақ тілінде іс жүргізуге төселмеуінде болып отыр. Қылмыстық істердің мемлекеттік тілде жүргізілуі, негізінен судьяның, прокурордың, тергеушінің

мемлекеттік тілді білу деңгейіне байланысты.

Ал енді Қарағанды облысы Шахтинск қалалық сотында мемлекеттік тілде азаматтық істің қаралуы өте төмен. Мысалы, 2022 жылдың 12 айындағы статистикалық мәліметтер бойынша, қалалық сотқа түскен азаматтық істер бойынша, жалпы өтініштер саны 1394 құрайды, оның ішінде мемлекеттік тілде түскені тек 12 азаматтық іс. Ал жергілікті мемлекеттік мекемелерден, құқық қорғау органдарынан бірде-бір азаматтық іс мемлекеттік тілде тіркелмеген.

Сот ісін жүргізуде мемлекеттік тілдің қолданылмауы тілге байланысты заңдар талаптарын өрескел бұрмалау салдарынан туындаған өзіміздің жасанды өзекті мәселеміз. Тілге өгейлікті өзге емес, өзіміз жасап отырмыз. Қолымыздан келгенше заңға сүйеніп, тілдің пайдаланылуын талап етсек, қазақ тілін толық қажеттілікке айналдырған болар едік. Сот ісін мемлекеттік тілде жүргізу тек соттардың жұмысы емес.

М. РЫСЖАНОВ,
Шахтинск қалалық сотының судьясы
ҚАРАҒАНДЫ ОБЛЫСЫ

